



大岳太和山誌卷之五

藝文

序

元

武當事跡序

息刺忽

承務農事

即無勸

朱漢上曰坎為天地之中聖人得天地之中則能與天地日月鬼神合先天而天弗違聖人即天地也後天而奉天時天地即聖人也聖人與天地為一是以作而萬物

觀火北方之卦也大元運啓于北眷命自
天統御乾坤竝明日月山川鬼神亦莫不
寧至元庚午冬

玄帝現龜蛇瑞相於大都高粱河金水中此後
天而奉時之驗也

玄帝北方玄武之神也尊居天一位鎮坎宮威
攝萬靈周行六合武當山

玄武之所寓

玄武非此山不足以顯其靈此山非

玄武不足以彰其名此先天而天弗違之理也
大元

玄帝皆北方之聖人是以與天地爲一聖作物
觀天道之常僕蒙古人玆魯古氏祖父以
恢拓疆宇之功分駐東魯僕自幼從銀青
榮祿大夫行中書省左丞相蒙古臺南證
三教之書頗嘗涉獵雖累歷任途心未敢
怠茲欽奉宣命來守于均而武當福地正
居境內到任之初詢問此山事實所傳不

同未委堪信或告之曰此中有前承應劉
洞陽道學進士也必能知會一日訪之乃
出所編武當總真事跡三卷寔符所願盥
手閱誦不出戶庭則武當萬古之靈蹤已
遍歷矣至於前代之沿革佑聖之仙踪宮
觀之本末神仙之隱顯與夫峯巒之秀谿
澗之幽昆蟲之靈草木之異井井有條而
不紊因索之以廣其傳願與四方樂善好
事君子共亦足以彰北方聖人與天地合

德之大

啓聖實錄序

趙孟頫集賢學士

易曰天一生水地六成之天一者數之始
也水者萬物成形之始也生數竒成數偶
於位爲北方北者背也北方象人背故北
極出天最高又北之爲文從人相背陽至
冬至而止又自冬至而復生於卦爲坎水
之爲文象形爲坎卦東西分流於乾坤之
四德曰真真者正固也二儀在天斗牛女

大谷和山誌 卷五
三
虛危室壁七宿列於北方成形爲玄武玄武者龜蛇青龍白虎朱雀皆一物玄武獨二物不謂之龜蛇而謂之玄武者玄之爲色赤而黑龜蛇則皆有鱗甲武之象也玄武之神始降宋真宗時爲祠徧天下皇元之興實始於北方北方之氣將王故北方之神先降事爲之兆天既告之矣武當山在西南方巍然高且大玄武神依焉黑衣披髮仗劍踐龜蛇人往見之至今常然天

一真慶宮主張君洞困篤於信道強立不撓皇太后聞而召之會京師旱去年九月不雨至于三月天子以爲憂皇太后使人持香從張君禱焉先雨張君爲之日時已而果然雨數日乃止遠近皆沾足皇太后厚賜之盡散與其衆不以一錢私已其行若是真所謂絕無而僅有者哉是宜神之相之也張君持所刊嘉慶圖徵余爲叙余爲誦所聞而書之

嘉慶圖序

虞集學士

天之高不可知也日月星辰之象吾得而
觀焉地之厚不可度也山川草木之形吾
得而察焉神之妙不可測也變化應感之
跡吾得而擬議焉是道也洞困張先生其
知之其作玄武嘉慶圖是以其言曰武當
之爲山也七十有二峯皆奇偉恠絕而所
謂紫霄峯者又七十二峯之中峯也然則
其能出雲雨見靈恠也因宜矣又曰其帝

而神之者曰玄武玄武者在天爲虛危之
宿在地托龜蛇之靈於五行爲水於五色
爲玄而其數則一也夫一之爲一也離數
而言之則一固造化之所由分即數而言
之則一固十百千萬之所由起也然則其
寓天地之中而行乎天之一非天下之所
謂至神者與洞困曰自是而上吾不可以
言喻也自是而下吾猶得以迹言之於是
與其徒唐中一劉中和取其瑰異顯著者

圖而傳之將使天下觀者動心駭目必有
以啓夫警畏感慕之意焉予從玄教太宗
師嗣宗師知洞困之有功於武當也曰洞
困居武當攻苦食力廿有餘年梯危架險
經營締構作宮室以奉香火夫以窮山幽
谷比壯麗於通都大邑則洞困規畫運量
其可以淺淺窺哉其佐而成之者同棲巖
穴之士也會予弟佐邑在武當爲近故得
詳言之

贊

元

真武像贊

虞集

真武像吳興趙公子昂寫其夢中所
見者而上清羽士方壺子之所臨也

吳興趙公前代公族神明氣清靜處直獨
乃夢天人披髮跣足玄衣寶劍坐臨崖谷
再拜稽首仰視返伏念昔敬事存思莊肅
致意接對光輝心目如聞教言嘉子誠篤

爾善繪事追步顧陸凡吾真儀子善記錄
審而傳之與世瞻矚傍有介士玉板金籙
曰帝告汝錫爾榮祿冉冉而升夢亦遂覺
明月在戶香彩徧屋取火亟寫神運掌握
毫分無失三十其幅丹青既成齋戒韞匱
有堂授受先事稷卜而其祕夢初不以告
晚有相師泄其玄躅人始得傳錦標鈿軸
方壺仙人潔以薰沐臨池擬容誠比玄玉
有得之者昭事毋瀆

上帝臨汝介以景福

湘王贊真武

皇皇上帝一氣分形虛危鍾秀坎离孕精
功高衆聖德輔九清小臣凡昧罔敢爲名
贊趙元帥

胚暉梵炁挺性自然稟金精乎孕秀正水
德以通玄樞機造化威震分地尋聲赴感
如意茲憐恩霑品彙靈變三天振宗風於
永劫闡教法於萬年

銘

元

銅像銘

劉辰翁

天地仙水中鉛範合堅凌風烟生青蓮劍
蜿鱣按大千龜蛇纏劫運遷飛乾乾玄玄
天萬萬年

國朝

太和山銘

汪道昆巡撫都御史

赫赫

成祖張皇聖武中外以寧左右六師玄君陟降

抗我皇稜大報神休敬脩祠事帝時用興

疆理隩區離宮錯起粲若繁星太和崔嵬

金城千仞以象勾陳厥有神臯冠以黃屋

俯擊八紘嵩少及肩參居二華雄視南衡

江漢分流會于二別神物有徵禔福邦家

韃橐不試民物孔殷肇祀迄今莫不祇敬

崇事明禋亦越

世宗穆穆玄德通于神明申命司空有事言

土百度維新費出上方鳩工程物勿以罷
民在宥寰區四十有五載治定功成

皇帝承之翼翼昭事罔或不欽三事大夫咸有
一德夙夜惟寅嗣服不愆率由其舊至治
烝烝百粵三苗駢首伏質境內皆平威行
匈奴名王稽顙款塞稱臣凡厥有生舉首
內嚮

天子之勲介福宣威保茲

天子維岳效靈自古七十二家登封有跡猶侈

令名煌煌我明世脩鴻業振古莫京不佞
守臣敬共方祀三謁帝闕徼惠文昌用章
盛美播於無垠

記

元

大五龍靈應萬壽宮碑

揭傒斯集賢直學士

至元二年歲在丙子武當山大五龍靈應
萬壽宮武當殿成玄教太宗師特進上卿

總攝江淮荆襄等處道教吳全節爲集賢院言翼軫之墟襄漢均房之間有山焉根蟠八百里峯之高者七十有二巖之幽者三十有六澗之深者二十有四天垂地接陽虛陰翕不可名狀名曰太和之山玄武神得道其中改號武當謂非玄武不足當此山也山多神宮仙館其大者有三曰五龍紫霄真慶而五龍居其首唐真觀中均州守姚簡禱雨是山五龍見即其地建五

龍祠宋真宗時陞祠五龍觀賜額曰五龍靈應之觀其後廢于靖康之旤孫真人元政興之又廢于金末之兵皇元受命與天地合德大興老氏之教扶運翼世以迎休祥山之有道之士汪思真奮然特起辟草萊剪蓄翳一舉而新之先太宗師上卿張留孫初總攝江淮荆襄道教奏以其山葉希真朝覲天子大信其道至元二十三年詔改其觀爲五龍靈應宮以希真主之居

八年而侯道懋繼之又二十年而續道成
繼之仁宗皇帝天壽節實與玄武神同遂
加賜其額曰大五龍靈應萬壽宮仍甲乙
住持歲遣使以是日建金錄醮祝釐其山
自是累朝歲遇天壽節一如故事此後大
建玄武殿宜得詞臣文而勒之石以彰國
家之美以重此山明年三月二日集賢以
聞詔以命臣俛斯臣俛斯竊謂名山大川
能出雲雨以澤萬物產財用以利萬民毓

英賢以輔萬世必宅天地之奧當陰陽之
會磅礴融液與大化終始故中必有神出
幽入冥此感彼應如風之在谷所觸皆通
水之在地無往不達况此山葆乎中和統
乎陰陽應變合行與神俱藏羣仙四朝而
特起乎中央非玄武焉足以當之則其宮
室之崇享祀之嚴應國家之運為生民之
依者固有在矣殿之建玄教大宗師臣全
節實出私錢萬緡為之倡而住山續道成

張道真是明復邵明庚李明良先後贊而
成之其屋壯麗嚴峻洞達高廣蓋與茲山
相雄世所稱神仙曰殷長生房長鬚馬明
生田篆衣之徒皆成道于此是以論人傑
必本於地靈也其辭曰虛危之精玄武君
上臨玄天貴且尊穹龜顛扇騰蛇蜿手指
北斗酌乾坤武當之上號太和神君居之
降百魔五龍守衛嚴不訶冷氣自少元氣
多神君生在天地先谷神自養天地根二

十四炁如環旋七十二候無頗偏四十二
載昇玄天玄天之樂不可言身着玄衣坐
紫府蒼龍在左右白虎朱方翼翼朱鳥舉
騰精躡景我爲主百靈守之誰敢侮或按
長劍坐黃庭吐納日月含風霆五龍冉冉
隨降昇倏而去之若流星忽而來兮兩冥
冥鬼車九頭匝火屋山鬼倚樹惟一足飛
蝗蔽天食百穀長蛟鼓浪沈平陸神君一
顧赤爾族神君自居武當山人能學之盡

得仙前有殷房後馬田陳搏尹軌相攀援
新開大殿凌紫烟璿題藻井相鈞連神君
居之樂無邊保我聖曆億萬年

大五龍靈應萬壽宮瑞應碑

前人

世祖皇帝初營燕都歲十有二月龜蛇見
于高梁河之上召問諸儒臣翰林學士承
旨臣孝祺等對曰國家受命朔方上值虛
危其神玄武其應龜蛇其德惟水水勝火

國家其盡有宋乎此水德之徵應也詔即
其地建大昭應宮以祠玄武後七十有四
年復以今上天壽節見于均州之武當山
大五龍靈應萬壽宮武當相傳黃帝時玄
武以三月三日降于此山仁宗天壽節適
與神所降神同歲遣使建金籙醮祝釐其
山之五龍後以爲常歲四月十有七日是
爲今上天壽節至正二年集賢院以玄教
大宗師臣全節言奏以法師陳斯與行使

事時均房之間久旱入山而大雨及竣事
之旦焚章殿陛之東有赤蛇綠龜見其所
盤回久之忽不見自郡縣陪祭官以下數
百人莫不驚覩以爲禎祥皆呼萬歲襄陽
守臣上其事集賢及玄教大宗師集賢遂
聞之天子且請勒石本宮以昭神庥乃詔
臣俛斯爲之文臣聞天地之應必於其類
惟於我朝莫盛世祖而龜蛇於冰凝霜沍
水德行令之時見于定鼎之地不十年而

宋亡天下爲一此所示天子受命之符也
今復以雲行雨施水德布澤之時見于天
壽節祝釐之所必將復見中統之治如世
祖時也矧皇上自即位以至于今罷遊畋
遠聲色日進儒雅講求聖學聞一言之善
一諫之切未嘗不嘉獎采納宵衣旰食憂
勤天下思復中統至元之治蓋十年于茲
若以時則可矣以其像固已兆矣是祥也
必不虛應天下何幸即日見之宮舊有閣

在玄武殿後至正元年夏本宮住持邵明
庚李明良節歲計之羸會檀施之積重建
之累土爲臺崇二尋有半樹三薨之閣而
三其臺之崇上六楹以奉三玄武像下十
楹列爲三祠中以祀神父母左以棲蓬萊
十真右即蜀之梓潼神總名之曰玉像閣
閭方落成而使者至神人若交焉臣侯斯
謹拜稽首而作歌曰聖人作兮百神依水
德集兮應虛危指靈山兮祝皇釐玉虹拖

兮紫電飛笙磬合兮斗柄垂冠七星兮九
霞衣進有秩兮退有儀綠章騰兮啓天扉
風蕭蕭兮雲披披永介帝壽兮億萬期赤
蛇蜿兮繞綠龜外不驚兮內不疑來莫知
所從兮去何之神皇皇兮憺忘歸旆玄旂
兮劍陸離嘉祥見兮大慶隨吾皇永兮繼
黃羲如世祖兮御九圍神降祥兮無已時
大天一真慶萬壽宮碑

程鉅夫 翰林院學士

皇慶元年春三月京師不雨徧走羣望詔
武當道士張守清禱雨而雨明年春不雨
禱而雨又禱又雨既霑既渥仍大有秋兩
宮大悅初均房之間有山曰太和又曰仙
室以玄武神居之名武當踞地八百里峯
七十有二最高曰紫霄之峯峯之最勝者
曰南巖巖前有洞天二曰太安皇崖天顯
定極風天上出浮雲下臨絕澗猿啼鳥噪
豺虎所家人可投足者僅尋丈許道家言

龍漢之年虛危之精降而爲人修道此山
道成乘龍天飛是爲玄武之神至唐真觀
益顯天下尊祀宋理宗時詔道士劉真人
住宮南巖不克漢東異人魯大宥隱居是
山草衣菲食四十餘年救灾捍患預知禍
福時人神之天兵破襄漢去渡河訪道全
真西絕汧隴北喻陰山至元十二年歸與
道士汪真常等修復五龍紫霄壇宇獨結
茅南巖或請作宮庭曰非爾所及也其人

將至矣二十一年秋九月師自陝西來年
三十有一願為弟子大宥欣然曰吾遲子
久矣即授道要明年春正月大宥仙法師
躬執畊耨墾山鑿谷種粟為食繼帥其徒
剪檜翳驅鳥獸通道東自山趾絞口七十
里至紫霄宮五里至南巖巖北下三十里
五龍宮又四十里抵山趾蒿口三月三日
相傳神始降之神士女會者數萬金帛之
施雲委川赴乃構虛夷峻拔木窮谷刊石

窮崖即崖為宮廣殿大庭高堂飛閣庖庫
寮次既嚴且備炫晃丹碧轆轤雲漢像設
端偉鍾鼓壯亮引以石逕蔭以杉松積工
累資巨萬計歷二十餘載乃成墾田數百
頃養衆萬指至大三年今上皇帝儀天興
聖慈仁昭懿壽元皇太后聞師道行遣使
命建金籙醮徵至闕及禱雨輒應賜宮額
天一真慶萬壽宮置提點甲乙住持制加
神父號啓元隆慶天君明真大帝

神母號慈寧玉德天后瓊真上仙賜師號體玄
妙應太和真人延祐改元春二月大司徒

臣羅原奉

皇太后旨命師乘騎奉香幣還山致祭冬十月
集賢大學士臣陳灝請加賜宮額大天一
真慶萬壽宮竊惟聖天子端源清之本躬
垂拱之化父天母地懷柔百神陶成萬類
子育羣姓宵衣旰食可謂至德也已師以
雲棲霞舉之侶而能振道濯德焦心苦志

奮樹堂壇以承天庥亦可謂豪傑之士矣
師闔䟽果毅方嚴質茂雖大祠祭不待沐
浴更衣所感必應雖身被顯寵如始入山
其有道者耶若神之德廣大混沌變化無
方謂列宿所鍾詎不信然臣鉅夫謹拜首
稽首而獻詩曰翼軫之墟均房間白雲我
我武當山根盤千里阻且艱七十二峯羅
煙寰帝遣玄武驅神姦披髮仗劍衣黶黶
穹龜修蛇猛且閒垂雲而來御風還跂予

望之杳莫攀真人學道鑄堅頑飛上千仞
誅榛管幹旋天機啓天關瓊樓珠宮翠迴
環霞披霧映黃金鑲湛恩大兮帝所頒神
來居之珮珊珊寒松蕭颼水潺湲飛香滿
空馥蕙蘭願神永永哀民艱汛掃穢濁無
恫瘝我皇萬歲御九寰興聖怡愉長朱顏

國朝

武當五龍靈應碑

劉三吾 學士

武當山在襄陽均州南三舍許盤亘八百
餘里上有七十二峯中有三十六巖二十
四澗羣峯擢秀靈氣攸集是爲嵩嶽之儲
副荆襄之洞天福地也相傳玄天之氣之
神當軒轅氏時震夙淨樂國王家乳于母
之脇左瑞雲垂覆天花飛雨異香滿室年
十五辭親出俗誓斷妖魔匡扶劫運至玉
清紫元君授以無極上道俾之越海東歷
翼軫之下訪登是山擇衆峯中冲高紫霄

百陽者居之當契太和逮昇舉之後五百
歲被黑衣披髮跣足履坎離之真歸根復
位鎮極北方自茲風穴雷洞霄館龍宮神
功顯赫靈異非常時則于紫霄天柱峯蓋
勅建宮殿棟梁楹薨集桶闌楮一不假木
悉範銅爲之中設金像與雷吐雲變化不
測以故歷年弗壞得賜觀額曰真慶曰護
國曰聖佑曰紫極曰靈應者非一唐真觀
中歲苦暵早詔有司禱名山武當軍節度

使姚簡身詣是山齋禱其夕有五儒具衣
冠者見謁自謂五氣龍君頃之玄雲四興
其雨如注在田之稿獲遂有秋簡具以聞
太宗勅于中山別勅五龍觀以旌靈異緣
此名聞天下玄天之神則以黑駝裘角之
劍斷魔削邪爲國爲民興利除害民所禱
禮者往往于是龍宮獲靈貺焉夫何元季
荐罹兵燹殿宇赭然爲墟會陝咸寧丘公
玄清偕其徒蒲善淵道漢中抵四川至金

州商山求勝地栖息不可得洪武四年復
自襄陽歷均之武當顧瞻徘徊閱茲福地
罹爾厄會首兜拾瓦礫理其故墟師徒苟
得廬就處已即積精存神修真導和服行
清淨承學大來明年士子玄清規復龍宮
其故所稽材陶瓦覆城貌堅遠近樂施不
期歲間宮殿廊廡栖止廬舍次第一新殿
塑聖像其中神將前列鍾鼓在懸考擊以
時羣神百靈有位于廡是使遊者入山如

行畫圖樓觀鳴鴉峙洞戶螽蟴綴堂庭截然可
謂曰完嗟乎自開闢以來武當有山聖真
出世其八十二化宜與天地同久燬而復
隆有吾玄清龍宮是復玄宰是奉胼胝拮
据勞勩萬端其道緣所致將不與是山同
垂名不朽也哉洪武辛酉春玄清以行能
被薦拜監察御史賜之室辭明年壬戌超
擢太常寺卿其徒蒲善淵則選爲均州道
正善淵來京以公紹開茲山丕闡神貺

予文壽諸石相是後者善淵及善寧等也

榔梅碑陰

胡濙禮部侍郎

永樂二十一年九月二十四日於文華門
啓大岳太和山興聖五龍宮提點李素希
讀書明理煉性修真志節孤高廉靜寡慾
薄於自奉矜恤貧難糲食粗衣心常自足
不時舉手加額曰願

聖皇萬歲

太子千秋國泰民安時和歲稔物無疵癘四

海昇平凡人慕其德而趨向者莫不諭以
忠孝導以慈仁勸善懲邪咸蒙感化年九
十三歲無疾端坐而終羽化之後齒骨俱
青人皆驚異

皇上備詢其故再三嗟悼稱許遂諭

臣濙并翰

林大學士

臣楊榮

臣金幼孜曰此老一生

精勤至道忠君愛國人罕能及觀其骨青
死必爲神矣至於次日早

皇上又復惓惓軫念所有原賜

勅書二道未經勒石以傳永久奉

皇太子令旨他真是修行得道的好人

父皇比先賜他的

勅書你而今去都與他鐫在碑石上休泯沒了

這等好處敬此謹同

欽差到山建醮隆平侯臣張信禮部尚書臣金

純工部右侍郎臣郭進委令均州守禦千

戶所正千戶臣朱彛斷取真石一方以正

一嗣教真人臣張守清篆額玄天玉虛宮

提點臣任自垣書丹遇真宮提點臣羅鳳

翔鐫刻借戶部主事臣王和湖廣布政司

右叅議臣諸葛平均州知州臣吳禮興聖

五龍宮提點臣吳繼祖臣施淵靜道士易

本中等同徒立石于本宮榔梅樹之原

碑陰

前人

洪熙元年二月望日

皇帝用香帛祝文分遣大臣遍祀嶽鎮海瀆歷

代帝王明神先聖

大岳太和山廼
祖陵及諸王陵寢俱以大牢惟

玄帝登真之所

太宗文皇帝勅建宮觀三十三處金碧交輝仍
於天柱峯冶金爲殿範神之像繚以石城
壯觀堅麗曠古未有

今天子繼志述事陞進茲山同於嶽鎮

命臣胡濙代祀臣濙奉

命惟謹恪同湖廣布政司右叅議臣諸葛平均

州知州臣吳禮臣張亨均州守禦千戶所

正千戶臣朱彝及本山

玄天玉虛宮提點臣任自垣等登山之日忽
有鶴一十五雙盤旋於

金殿之上良久始去五色祥光照耀山谷將事
之時陰雲四合方祭之頃星斗燦然祭畢
陰雲復合儼若

神靈歆格聚散之狀官民道衆鼓舞懽忻咸以
爲

朝廷精誠之感千載一時之遇也

聖德昭應碑記 李衍都御史

天人一理也蓋乎人以格天而天昭應之此理之必然也昔雖一匹夫之微一言行之善猶能動天地况父母天地而為之子者體其塞性其帥而與之合德者乎世傳真武神者即北方玄武之神也神以帝稱蓋天之主宰也天之為天理與氣而已有是理必有是氣氣有陰陽變合以生五行

播於四時造化萬物理實主宰之于是乎有帝之名然五行之生各異其質各居其方各司其時故其行木其方東其時春其色青則其神曰青帝其行火其方南其時夏其色赤則其神曰赤帝其行土其方中央其時四時之季其色黃則其神曰黃帝金行時秋白色其方曰西是為白帝水行時冬玄色其方曰北是為玄帝帝一而已

魚統五行分居五方流行乎四時變化既

成萬物無乎不在其居無迹其妙莫測茲
帝之所以爲神也然天包地外而其氣常
行乎地之中則其神之靈必常于其氣之
所聚高明秀異之地發焉武當之山周廻
八百餘里峯嶺秀拔中有三十六巖之勝
去嵩嶽爲甚近是亦天地之中五行清淑
之氣之所鍾毓誕扶輿磅礴而鬱積者則
玄帝之神恒於是焉著其靈異亦其理也
帝其可以方所求哉故昔之人建祠茲山

以祀之歷代相襲不替我朝

太宗文皇帝克慎在位昭受上帝申命之休即
巖郊社之理徧望之儀復於茲山因往蹟
更新神宇以極其崇奉之典宮殿嵯峨照
耀蓋振古所未嘗有也

皇上紹承大統爲天地民物之主懋昭大德盡
仁孝誠敬之心肆致道行化洽邦家輯寧
風清俗美遠近悅服

聖心欣慰以謂皆自天之祐惟神之貺也於是

思咨帝之休益隆崇奉乃禱銅爲神像一
從神像四供器全皆飾之以黃金承之以
白石簡命近臣太監陳喜左監丞陳道右
監丞林茂祗送到山會同太監韋貴暨藩
臬郡邑諸臣僚迎奉于紫霄宮協心致齋
設醮以妥之醮設始於十一月初七日甲
子初八日未刻近宮展旗峯瑞光現者三
南巖宮現者一皆狀如月望而圓紫蓋峯
光現者一狀如錦垂而直色皆五彩及申

復有光如上弦之日現于宮上及玉虛宮
之正殿色皆如初現次日申刻光復疊現
於紫霄殿南與西狀與色皆如初而五老
峯玉虛殿西皆有光現狀類五色虹復有
玄雲如旌旗狀現於太和宮大頂東天門
之上其下有五色半光翔擁久之方散至
初十日太監陳喜等相率行祝延

聖壽禮畢以其月十五日妥神于宮仰惟

聖德感格帝心煥發祥光層現疊出皆不勝懽

大德元和中記 卷五 二十
怵既其實以聞以衍方被

命有事荆襄亦嘗快覩其勝謂宜有言以記垂
示無極伏惟天地以生物爲心帝即天地
之心主宰生成者也其在北方司冬令則
其職在凝固太和以幹造化生長之仁也
物終于此復始于此帝之仁覆萬物其有
窮乎

皇上祇承于帝所祈者上延

慈壽下昌

聖嗣內和家邦外寧海宇以遂萬有之生成
皇上之心亦帝之心也然

皇上克體帝之心使奉而安之者弗克仰體
皇上之心則澤將壅于下矣何以致民物又安
而神罔時怨恫哉今諸中貴臣皆知畏天
之靈遵國之度不倚神而慢不倚公而私
不倚威而震可謂克體

皇上之心䟽導德澤而覃及民物矣此神所以
日監在茲歆悅于上故彰其靈異而降祥

也歟斯其可記也故謹書以勒而係之以
詞詞曰我我武當玄帝攸宮報祀以典盛
始

太祖於皇肅穆續承大統像帝于宮益隆崇奉
曰帝有神享于克誠洋洋如在瑞光疊呈
惟茲臣庶于焉快覩稽首嵩呼紛其屢舞
余曰於

皇一德格天有感則應效斯昭然臣時被命撫
臨勝境祇謂椒庭躬逢其盛嗟惟中貴克

廣

皇仁民康物阜帝悅神歆勒詞真珉庸紀其事
覩者鑒焉或識予意

金錄大醮碑

黃衷都御史

聖天子繼

天御寓于茲五年大禮告成

世廟有翼二儀太清海嶽寧謐三光五緯上循
其度曰臣曰民下若其軌猗歟盛矣聖心
猶不自滿假兢惕惕以

祖宗委祉錫禧盛自今日必暢好生之至德行
垂裕之繁休謂非神明之力曷可憑者乃
考先代之故事憲

祖宗之舊章以大岳太和山北極真武之神道
大功廣效靈自古惟我

皇朝尤謹崇事於是範金像儀制器備物命內
官監臣李瓚虔奉以往命湖廣鎮巡三司
等官度材制役費罔煩民具景命之青詞
表聖心之祕祝命正一嗣教真人張彥頤

左至靈吳尚禮率羽衣之士四百六十眾
涓辰日之吉即淨樂之宮敷寶笈之大科
演玄祖之大法設金籙大醮爲壇二爲日
以三以七爲分位三千九百總焉時則鎮
守湖廣地方御馬監太監潘真總兵官清
平伯吳傑巡撫湖廣都察院右副都御史
黃衷撫治鄖陽地方都察院右副都御史
蔣曙湖廣布政使余祐按察司副使陳昌
侯綸都指揮僉事余承恩馬聰先後來集

執事有恪晨夕瞻禮則大監臣李璿右叅
議盧煦主之守備安陸州地方內官監太
監楊保巡按監察御史鄧顯麒右叅政胡
忠左叅議楊易蔣同仁右叅議許路按察
使盛儀副使劉士元楊守禮夏邦謨僉事
林遂許宗魯毛紹元鄭光琬汪溱何鰲都
指揮僉事申錫段輔罔不齋心繫慮協相
厥成先是告肆洪張天高氣肅瑞霞呈彩
五色絢爛被冒陵谷合郡士庶縱觀欣忭

咸曰

天子萬壽三宮茂祉前星早耀此其祥矣臣維
古者聖王雖化被無外而立德有敬雖富
盡四海而居福有本是故辨方秩祀類上
帝而徧百神昭其敬也巍巍帝堯祝獻多
男赫赫宗周頌歌百世重其本也今我
聖天子孝隆兩宮而不以為德仁被幽遐而不
以為功猶敬恭明神為民祈福洋洋在上
有感必應殆將發天地之儲精合山川之

正炁鍾爲元良應期而出尚繼繼繩繩以
綿我

皇祚於億萬斯年者其端在茲乎在列者咸謂
臣秉宜記敢頌以詩詩曰於維大岳盤均
路房吐靈納異萬神之藏羣峯矗矗以翼
天門孰奠厥位高乾厚坤於惟上帝妙幹
道機闢陽闔陰昭假匪私千巖萬谷有宮
有庭雲旂來止丹戶朱楹於穆

聖皇神明厥德普照爲春霞燭爲日大道斯同

迺究玄懿惠不謬施霈澤爲川緝儀維腆
曰惟神宗睠茲福地轉歎而穰化沴而禧
雨雨暢暢若金若繪匪制崇典孰視精誠
駿奔有位登視鑒歆承華世世百靈既職
九有既育作此頌詩以永真玉

祈豐年祭文

吳廷舉都御史

與造物游必其視天下如敝屣者也享萬
世祀必其出斯民於水火者也惟神棄王
位而不居試諸難而不變戮羣妖而不懼

度世教而不迷功滿道成天行雲卧受

天明命坐鎮名山衮冕圭璋不生不滅星辰雷

電倏顯倏藏相我

太宗功烈尤偉紫霄天柱崇高踰五岳之尊金

殿琳宮華麗極百王之奉永惟翼軫之下

地屬荆湖是以桑梓之邦仰如父母水旱

必禱疾痛必呼趨者如川應之如響邇來

連歲洪潦爲殃穀麥失收室家漂蕩廷舉

欽承

